

每週經課朗誦經文(巴克禮漢羅/教羅)2014/01/26

共同經課 - 1

以賽亞書九章一節~四節

1 總是 hit-ê bat 受痛苦 ê 地無 koh tiàm-tī 烏暗，前上帝 hō Se-pò-lùn kap Ná-hut-tha-lī ê 地受看輕，後來就 hō 沿海 ê 路，約旦 ê 河外，外邦 ê 加利利，得 tiòh 榮光。2 行 tī 烏暗中 ê 百姓看見大光；khia 起 tī 死蔭 ê 地 ê，有光照 in。3 你 hó chit-ê 國民 choē-choē，亦加添 in ê 歡喜；in tī 你 ê 面前歡喜，親像收割 ê 歡喜，親像人分所搶 ê 物，hit 號 ê 快樂。4 因為伊所背重 ê 擔，kap 肩頭頂 ê 拐，以及壓制伊 ê 槌，你 lóng kā 伊 at 折，親像 tī 米甸 ê 日一樣。

共同經課 - 2

詩篇二十七篇一節，四節~九節

1 大衛 ê 詩。1) 耶和華是我 ê 光，是我 ê 拯救；我 beh kiaⁿ chī-chūi? 耶和華是我活命 ê 氣力；我 beh kiaⁿ chī-chūi? 4 有一項事我 bat 對耶和華求，我猶原致意 ài 得 tiòh；就是一世人 khia 起耶和華 ê 厝，看伊 ê 榮光，siàu 念伊 ê 殿。5 因為患難 ê 日，伊 beh 暗靜保護我 tī 伊 ê 帳帷內；將我 khng tī 伊布棚蓋密 ê 所在；舉起我 tī 石磐頂。6 Taⁿ 我 ê 頭殼得 tiòh kiáh 起，khah 高 tī 我四面 ê 對敵；我 beh tī 伊 ê 布棚獻歡喜 ê 祭；我 beh 吟詩，亦 beh 唱歌 o-ló 耶和華。7 耶和華 ah，我出聲求叫 ê 時，求你聽；Koh 求你憐憫我，應我。8 你 bat 講，Lín tiòh 欣慕見我 ê 面；hit 時我 ê 心 tùi 你講，耶和華 ah，我 beh 欣慕見你 ê 面。9 M̄-thang 對我掩你 ê 面；M̄-thang 受氣來趕你 ê 奴僕；你平素是做我 ê 幫贊；救我 ê 上帝 ah，m̄-thang 放 sak 我，亦 m̄-thang 離開我。

共同經課 - 3

哥林多前書一章十節~十八節

10 兄弟 ah，taⁿ 我對咱 ê 主耶穌基督 ê 名勸 lín 議論 lóng tiòh 相同，lín 中間莫得有分黨，就是 tiòh 一心一意大家相契合。11 我 ê 兄弟 ah，是 Kek-lâi 氏家內 ê 人 bat kā 我講，lín 中間有相爭。12 我 ê 意思是 lín tàk 人有 teh 講，我屬保羅，我屬亞波羅，我屬磯法，我屬基督。13 基督 kiám 有分開 mah? 保羅 kiám 替 lín 釘十字架 mah? á 是 lín bat 受洗禮歸 tī 保羅 ê 名 mah? 14 感謝上帝，tī Kek-你-sū-pò、Ka-iú 以外，我未 bat kā lín 一人行洗禮 15 免得人講 lín 受洗禮歸 tī 我 ê 名。16 我也 kā Sū-th ê-hoán-à 一家 ê 人行洗禮，其餘有 kā 別人行洗禮 á 無，我卻 boē 記得。17 因為基督差我 m̄ 是 beh 行洗禮，是 beh 傳福音；不在言語 ê 智慧，驚了基督 ê 十字架歸 tī 空空。18 因為十字架 ê 道理，沉淪 ê 人看做蠢，咱得救 ê 人看做上帝 ê 權能。

共同經課 - 4

馬太福音四章十二節~二十三節

12 耶穌聽見約翰關監，就退去加利利；13 離開拿撒勒，去迦百農 khia 起；chit 所在 tī 海邊，tī Se-pò-lùn kap Láp-tāi-lī ê 交界；14 是 beh 應驗早託先知以賽亞所講 ê，講，15 Se-pò-lùn ê 地，Láp-tāi-lī ê 地，沿海墘 ê 路，約旦 ê 河外，外邦 ê 加利利；16 坐 tī 烏暗 ê 百姓，Bat 看見大光；坐 tī 死蔭 ê 地 ê，有光起來照 in。17 Tùi hit 時耶穌起頭宣傳講，Lín tiòh 反悔，因為天國近 lah。18 耶穌行 tī 加利利 ê 海墘；看見兩個兄弟 á，就是西門，叫做彼得，kap 伊 ê 兄弟安得烈，拋網 tī 海裡，因為是討魚人。19 伊就 kā in 講，來 tè 我，我 beh hō lín 得 tiòh 人親像討魚 ê。20 In liám-piⁿ 離開網來 tè 伊。21 Tùi chia 進前，koh 看見兩個兄弟 á，就是西庇太 ê Kiáⁿ 雅各 kap 伊 ê 兄弟約翰，kap in 老父西庇太 tī 船裡 teh 補網；耶穌招 in。22 In liám-piⁿ 離開船，拜別 in ê 老父，來 tè 伊。23 耶穌遍行加利利，tī in ê 會堂教示，宣傳天國 ê 福音，醫好百姓間 tàk 樣 ê 症頭，kap tàk 樣 ê 病痛。